



ZHONGGUO JIUWENXIAN
SHIWEN JICHENG

中国酒文献诗文集成


第六册

明酒诗文集卷一


李修余 彭贵川 胡春秀 编著

中国文史出版社

中国酒文献诗文集



ISBN 978-7-5034-9866-4



9 787503 498664

定价：6800.00元
(全八卷·十册)



ZHONGGUO JIUWENXIAN
SHIWEN JICHENG

中国酒文献诗文集

第六册 明酒诗文集一

李修余 彭贵川 胡春秀 编著

 中国文史出版社



明酒诗文





钱宰

钱宰（1299—1394），字子予，一字伯钧，会稽（今浙江绍兴）人。元至正年间中进士甲科，以亲老不赴，教授于乡。洪武二年（1369）征修礼乐书，六年授国子助教，以赋《早朝》诗忤旨，遣归。二十七年，又征修《书传会选》，书成遣还。有《临安集》。《四库全书总目提要》赞其诗“吐辞清拔，设色浅淡，追步古调，寓意高远”。

分题赋载酒亭送友人之四川

大江发巴蜀，岷峨蔚嶮峣。子云性佚荡，逸气相扶摇。洒翰骋雄辞，凌云何飘飘。终焉敛其华，组丽不足骄。覃思著玄文，斟酌仿繇爻。闾言极幽微，绵络天地交。岂无好事者，载酒与游遨。胡为事黄门，投阁竟萧条。龙蛇不知藏，蚯蚓亦见嘲。天独昌其文，炳如日星昭。子行登斯亭，英爽或可招。谓我欲问奇，峡水阻且遥。（文渊阁四库全书本《临安集》卷二）

摘句

放船白下门西路，买酒长干桥上楼。（同上卷二《赋得秦淮夜月送友人往茶陵》）

季真赐宅已无王，太白酒船空棹归。（同上卷二《分题赋镜湖送张用中》）

南湖杨柳酒船去，西塞桃花渔唱来。（同上卷二《题毗墟寺临汪轩》）

太羹玄酒有至味，海月玉珧皆小鲜。（同上卷二《题鲍厚礼画菜》）

王彝

王彝（？—1374），其先蜀人，本姓陈氏，后徙嘉定（今属上海）。少孤贫，读书于天台山。明初以布衣召修《元史》，旋入翰林，以母老乞归，赐金币遣还。洪武七年（1374），因魏观事，与高启同诛于南京。著有诗文集《三近斋稿》《妨雌子集》，辑成《王常宗集》四卷、补遗一卷、续补遗一卷。

乡饮酒碑铭

皇明既一，四海乃大兴礼乐，以新令俗、还古道为千万世计。惟乡饮酒，繇近代以还，蔑之有讲。洪武五年，始诏郡国，以孟春、孟冬举行斯礼而读律焉。其时，江夏魏公实守苏州，奉诏惟谨，既一再行之，然尚恐未能宣上德意，是以明年复参考仪礼，以授经历李亨教授贡颖之使，与郡士周南老、王行、徐用诚共商校之，且使张端及诸生相与习焉。爰舍菜先圣先师，以孟冬之月吉日癸未行于郡学。其大宾为前进士魏俊民，介为先圣五十四世孙思，黜僎为推官王芳，三宾为范廷征，众宾为邵允礼、钱琼等十有一人，次僎为知吴县事曾黼、知长洲县事张其，而乐正以张由，司平以滕权，贤而得其人如此。又特位主老人曰昆山周寿谊，年百有十岁；曰吴县杨茂，九十有三

岁；曰林文友，九十有二岁：皆形充神完、行坐有礼老人，而得其人又如此。然后皆列坐八十以上者十有三人，七十以上者六十有二人，六十以上者四十有七人，五十立而听政役者百人。凡在位者之子弟，侍立者二十有八人。主宾僕介之赞相，爵尊豆筯俎洗之执事者皆具。又别为教授位，而吴县教谕徐鼎、昆山教谕陈圭次之，训导十五人又次之。长洲教谕周敏，则以侍其父南老；常熟教谕傅其，侍其父玉，皆降西北面立。合乡学及六县弟子员之立者，百有六十人。文武僚佐之在位观礼者若干人，农工商贾远近之观者又以千计。公年且七十，而朱颜焕如，独出人表，升降揖拜，竟日无倦。而其子子盘侍立进趋中度，于是化明乐和，众以大悦。既而乃读律，众复肃以听，皆曰：“今天子神圣，援吾人水火中而斯礼也，吾身亲见之，幸哉！”越五日，周老人还昆山，公躬出娄门之郊再拜以饯，都之士女观者又慨焉，以为幸见，且曰：“公于人之父兄也如父兄然，吾于吾父兄宜何如？”君子以是知公之政与孝与弟者，盖易易然也。且老人者生宋景定中，历元百年而遭逢圣代，意者天生斯老以待今仁寿，固已在百年先矣。微公，谁能表之？葬也居公之野矣，病废得扶曳以观焉，盖旷世之遭也。故为铭其堂下，碑曰：

于维皇王，正此方夏。爰释戎衣，有事郊社。祀享会朝，礼作乐造叶。神人既和，及乡饮酒。维乡饮酒，万方攸同。俾孝与弟，载臻时雍。显显魏公，牧我苏人。公有旨酒，乐我嘉宾。嘉宾戾止，以僕以介。公在泮宫，宾至则拜。出祖东壁，羞自东房。玄酒于尊，房户是当。有勺有勺，实彼爵矣。再拜稽首，献且酢矣。吹笙鼓琴，而瑟而箫叶。而间以歌，厥音犹犹。有黄其发，鲐背儿齿。百有十岁，眉寿曷已。公拜而馈，寔犹父兄叶。何以将之，筐有玄黄。宾既乐只，言旋言归。醉饱自公，祝公期颐。我子我孙，公之孙子。公我父兄，我孝我弟。公曰弗哉，天子明圣。天子万年，畜尔子姓。猗嗟苏人，今复尔古。我作歌诗，以告来世。（文渊阁四库全书本《王常宗集》卷一）

王翰

王翰，生卒年不详。字时举，禹州人。元季隐居中条山，后为翰林编修，寻谪廉州教授。夷獠乱，城陷，抗节死。著有《梁园寓稿》九卷。

酒家谣

大梁城中百万家，谁家沽酒为生涯。青帘白昼垂到地，书言美酒非为夸。座中多是江南客，卖茶贩盐为本业。自从伴着如花人，囊楮番番卷秋叶。日长不厌秦筝繁，夜阑不放清歌歇。篋里黄金索已无，朝来暮去情渐疏。秋风吹断高唐梦，但见阳台明月孤。昨日书来寄亲语，老病空床泪如雨。寄与佳儿促早归，何用离乡作商贾。市中卖得旧衣钱，独向黄河买去船。（文渊阁四库全书本《梁园寓稿》卷二）

劝君酒

劝君酒，岁将暮。新岁冉冉来，旧岁堂堂去。去者挽不回，来者无由驻。春风吹落花，花落深可惜。不知向君面，吹落娇红色。歌缓声，舞垂手，昨日少年今白首。岁将暮，劝君酒。（同上卷三）



葡萄酒

揉碎含霜黑水晶，春波滟滟暖霞生。甘浆细挹红泉溜，浅沫轻浮绛雪明。金剪玉钩新制法，紫驼银瓮旧豪名。客愁万斛可消遣，一斗凉州换未平。（同上卷九）

摘句

- 开轩翠色连书幌，隐几清阴落酒樽。（同上卷五《慈竹轩》）
- 佳客到门常载酒，道人求字不笼鹅。（同上卷五《临池清兴为张敬惟作二首》）
- 柳添新绿遮文旆，梅送残香入酒杯。（同上卷五《送郭工副焕章之汝宁放粮》）
- 酒饮贤人秋社散，星亡处士夜台寒。（同上卷五《挽草堂李先生为李居恭》）
- 篱菊也贪彭泽酒，海棠终污马嵬尘。（同上卷五《奉教和王达善学士梅花四咏》）
- 寻诗不畏途冲雪，沽酒那忧路有泥。（同上卷五《驴死口号简孙知县》）
- 气凌杯酒浑无力，冻涩琴弦已不张。（同上卷六《雪禁体》）
- 终日倚栏吟伐木，何时对酒赋嘉鱼。（同上卷六《奉教和怀友诗韵》）
- 心同陶令惟疏酒，宗继文中不续经。（同上卷六《和刘菊庄先生韵》）
- 驱寒但恨樽无酒，借暖今欣灶有烟。（同上卷六《谢士烈送柴》）
- 麝飘金墨诗情好，蚁泛宫壶酒兴宽。（同上卷六《简临颖大尹马文隆》）
- 金壶赐酒浮香蚁，彩笔生花点玉螭。（同上卷六《送孙克让赴京》）
- 新丰遣兴惟沽酒，泽畔行吟只命骚。（同上卷六《送故人韩士林北上》）
- 长干沽酒临风酌，采石题诗对月吟。（同上卷六《送监税李公考绩》）
- 故人别我如云散，浊酒同谁对月斟。（同上卷七《中秋感旧》）
- 绿酒喜随藜杖到，白头须插菊花归。（同上卷七《九日登瑶台山》）
- 载酒久无来问字，绝弦今已少知音。（同上卷七《简茅津渡梁巡检二首》）
- 对影莫辞金谷酒，披香空费锦囊诗。（同上卷八《再题玩梅轩》）
- 自收柏子归香鼎，旋拾松花入酒醅。（同上卷八《和陈克斋清明登瑶台有感》）
- 山城岁歉灯还恶，官舍愁深酒不釀。（同上卷九《灯夕在平陆感旧三首》）
- 浊酒沽来聊慰藉，拙诗吟罢更推敲。（同上卷九《雪夜遣怀二首》）
- 柏梁台下寻诗去，皇子陂前载酒游。（同上卷九《送洪洞刘允中入关》）
- 绿酒暂烘颧颊赤，玄霜难染鬓毛皤。（同上卷九《言怀简丁志善三首》）
- 莎汀浪暖渔舟出，茅屋风轻酒旆斜。（同上卷九《沙间桃林》）
- 青旆晓夸新酒出，玉蓑寒驾小舟来。（同上卷九《条山积雪》）

张以宁

张以宁（1301—1370），字志道，因家居翠屏峰下，自号翠屏山人，福建古田人。有俊才，博学强记，擅名于时，人呼“小张学士”。泰定中，以《春秋》举进士，官至翰林侍读学士。明灭元，复授侍讲学士。奉使安南，还，卒于道。以宁工诗，论诗主张复古，为明代秉承复古理论首开先河。著有《翠屏集》《春王正月考》等。

题李文则画（四首选一首）

渊明送酒

五柳门前秋叶衰，南山佳气满东篱。白衣人到黄花外，正是先生述酒时。（明成化刻本《翠屏集》诗集卷二）

子烜买红酒

吴江红酒红如霞，忆着故园桃正花。羊角山前几回醉，女发嗔汝未还家。（同上诗集卷二）

摘句

竹屋灯悬夕，椰瓢酒漾春。（同上诗集卷二《春日怀李叔成上舍》）

对酒杯彭泽，题诗愧浞陂。（同上诗集卷二《途中次子烜韵》）

船头将酒别，客里奈春何。（同上诗集卷二《别忻都舜俞用烜韵》）

燃松添酒酌，题竹记诗成。（同上诗集卷二《宿乌石》）

浮生万古有万古，浊酒一杯复一杯。（同上诗集卷二《次李宗烈韵》）

古藤酒醒春风在，璧社珠寒夜月空。（同上诗集卷二《高邨》）

禹穴出云藜杖外，轩台飞雪酒杯前。（同上诗集卷二《题远游卷》）

长思相觅饮君酒，亦欲即归投我簪。（同上诗集卷二《次李左司明举看田朱家堡韵》）

望云举酒思京阙，对雨裁诗倚柂楼。（同上诗集卷二《再次韵答之是日微雨大风》）

陈谟

陈谟（1305—1400），字一德，号心吾，又号海桑，泰和（今属江西）人。幼聪颖，元代应试不第，遂隐居讲学。长于经学，旁涉百家，学者尊为江西大儒。洪武初（1368）征至京师议礼，引疾而辞，家居教授。屡被聘为江广考试官。尝谓学必敦本，莫加于伦常，莫先于变化气质。一时学士，靡然从之，称之为海桑先生。著有《海桑集》十卷。

乡饮酒颂（并序）

邑之三老人以书抵余，曰：“太尹郝侯既修文庙，又即学宫，与士大夫高年行乡饮酒礼，吾三人位列众宾，思有以咏歌德化，自附于康衢击壤之谣，徒填臆莫克宣也。先生今奚斯，幸赐颂焉。”余逃虚空谷洒然，欣乃作颂曰：

思乐泮水，其宫有晔。显允郝侯，允恭允烈。冬日载阳，年登既穰。惠我黄耇，偕之乐康。维此官刑，自彼虞夏。汉增唐密，靡隙靡罅。大明造邦，删定广施。隆之约之，与时宜之。凡我编氓，毋或罹罟。读法斯警，饮酒斯誉。显允郝侯，惠我以安。载咏载歌，雅颂不愆。侯政有成，侯德孔硕。敢规《颂鲁》，用赞无斁。（文渊阁四库全书本《海桑集》卷三）

乡饮酒读法诗序

国朝奄有方夏，即详定法书，名曰《大明律令》。又命刑部取凡丽于法者，类编其书，名曰《申明诫谕》。尤虑中外远迩，弗加警惧，轻犯宪条，申命文武百司，岁取春冬孟月行乡饮酒礼而读法焉。民间率百户为一集，位以齿，董以里长。郡县则肃士大夫之老者为正宾，余为次宾。而郡守县令主其席，其仪酌取唐宋而务从其简，物贵俭素而务适其中。凡饮，皆先读法，然后行酒，所以使人人知畏而重犯法，人人知秩卑尊而隆齿德也。

洪武六年正月，实维其时。泰和县令尹、前御史刘公宗启即学宫而行事，自僚佐暨贤士、学官、弟子员等凡若而人，列位于明德之堂。于是学徒二三于于而前，正立张拱，奉法书而更读之。先令，次律，次诫谕，炳炳琅琅，观者如堵，听者动色。读已而燕，筮豆静嘉，衣冠严翼，竟酒爵，行无算，有充然饱德之实，无起座喧哗之失，皆额手颂曰：“此主上之泽也，令尹之化也。”

令尹治县，克勤克廉，端其教，不鄙夷其民，动如礼法，民自以不犯。其或观感信向有不齐，名隶申明籍中，不惟其所亲所友悚闻诵言，面颈发赤，虽其怨家闻之，亦凜然增唏，恨服化之晚，诚足以增夫天理民彝之重，岂徒饮云乎哉！

抑刑始于笞，笞始于十，至轻也。递递倍之至于杖，又递递倍之，杖至于百。何笞律简、杖律繁？笞十良民，犹不敢犯，杖百而犯者益众，然则法可不重乎？徒轻而流重，流至于三千里极矣。又加焉，非绞即斩，而率轻犯之。此国朝所深悯，而乡饮读法之制所以行也。

呜呼，仁哉！翼日学官自强成诗会稽中，常先生和之。诸在燕者或赓吟或自赋，以质诸令尹，谓余忝正宾，宜为序，遂次第书于卷端。（同上卷五）

乡饮酒诗序

洪武八年十月二十有五，日，我县大夫郝公好谦，率厥僚属暨县之士夫、民之高年，行乡饮酒礼于乡校明德之堂，遵国宪也。前期集宾佐，师生咸习其仪。是日，大夫肃宾于庠门外，揖让升堂，以序就位。乃命诸生，只奉大明律而朗读之。又参伍讲之，环堂阶而听者如织，决知禁防之不可犯，法意之无非仁矣。既而以法行酒，爵有经而饮不乱，诸生升歌，自宵雅肆三，达于台莱、菁莪，又赋《泮水》八章以终。洋洋乎，泐泐乎，沐浴熙明之膏泽，鼓舞循良之惠化，无不醉心焉者。

惟我大夫下车，两期坚守，如铁石至信，如汐潮平施。谨乎权衡烛隐，逾乎水镜，用能令出而从，化久而孚，得人之和，致年之丰。凡兹嘉与士民同其休、成其文者，孰非岂弟父母之心所形哉？

翌日，王君子与偕善赋者成为发德之什，而属其序于予。

嗟夫！读法《周礼》也，所以纳民于无过之地也。有画一之令与断，有贤大夫之善用法，西昌之邑，不其幸欤！

正宾陈谟序。（同上卷五）

胡翰

胡翰（1307—1381），字仲申，一字仲子，浙江金华人。官衢州府教授。洪武乙酉纂修《元

史》，书成，赐白金文绮，辞归卜居长山之阳，学者称长山先生。文章与宋濂齐名，工书，王世贞《国朝名贤遗墨》有其书迹。著有《胡仲子集》十卷。

牺尊辨

礼有牺尊，即献尊也。《司尊彝》曰：“其朝践用，两献尊，其再献用两象尊。”郑氏读献为牺，又音牺牺，为摩莎之莎，非也。献，举其事；牺，言其象：其为尊一而已。以其尊之一而谓其音亦同，不可也。

牺尊与象尊相须，郑氏谓牺尊饰以翡翠，象尊以象凤凰，其说亦非也。盖牺尊为牛形，象尊为象形，皆周尊也。王肃云：“牺象之尊，全刻牛象之形，凿背为尊。”宋刘杳言：“古者，牺尊、彝尊皆刻木为鸟兽，凿顶及，皆以出纳酒。”二家之言近之。而杳又云：“鲁郡地中得大夫子尾送女器，有尊作牺牛形。”晋永嘉中，青州盗发齐景公冢，获二尊，状类牛象，意者古之遗制也。苟以为刻木，安能久置地中不坏？或谓牺尊画牛，象尊画象，亦以木耳，非古之遗制也。盖二尊皆以铜为之，其取义皆以牛象而得名。牺尊为牺形，象尊为象形，则牺当读为羲，献当读如宪，各如其字之本音可也。献举其事，牺言其象，不害其为器之一也。

观于《闾宫》之诗，朱子不取毛氏沙饰之义，而今又取郑氏摩莎之音，岂非过乎？况杳之言足以证肃之说，有足信乎！宋皇佑中，得著尊，阮逸、胡瑗取其器，有脰，名壶尊可也；著地无足，名著尊可也，未能必其主名。及黄长睿见之，始定为著尊，以为尊皆有雁，唯其无足而著地，则礼之明堂位，所谓商尊曰著者是也。后有若长者，安知不以余言为然乎？余故具著于此，以见名物度数，在先王时不过有司之事；降及后世，虽学者不得而尽考焉，则夫斯礼之失也久矣。（文渊阁四库全书本《胡仲子集》卷二）

宋濂

宋濂（1310—1381），字景濂，号潜溪，别号玄真子、玄真道士、玄真遁叟，浙江金华人。明初政治家、文学家、思想家。曾被明太祖朱元璋誉为“开国文臣之首”。又与高启、刘基并称为“明初诗文三大家”，又与章溢、刘基等并称为“浙西四先生”。他因长孙宋慎牵连胡惟庸党案而被流放茂州（今四川省茂县和汶川），途中病死于夔州。宋濂坚持散文要明道致用、宗经师古，强调“辞达”，注意“通变”。他的散文或质朴简洁，或雍容典雅，各有特色。著有《宋学士文集》《孝经新说》《周礼集说》《龙门口子》（又名《诸子辩》）《潜溪集》《萝山集》《浦阳人物记》《翰苑集》《芝园集》等，后人合刻为《宋学士全集》七十五卷。

严宗奭小传

严盛宗奭者，会稽余姚人也。其裔于汉隐士子陵，家姚江之西，性坦质，待物无町畦。善饮酒，然未尝与庸俗人饮。荐绅先生过其门，不问识否，必邀致其家为具饮之。妻子告无费，宗奭解衣付酒家奴持去取酒。酒至，抚掌曰：“吾无忧矣！”倾所有奉客，务得其欢，不为它日计。或劝宗奭仕，不应。朋曹招与饮酒，即著巾往，往辄尽醉而返。宗奭作轩于舍西，号曰“临清”，而自号曰“客星樵隐”，且曰：“山水吾所乐也，亦将以矫夫污浊而冒利者。”喜读陶靖节诗，抚卷谓人曰：“是翁可人意。”或疑宗奭乐隐，宗奭曰：“靖节岂隐者哉？”或又疑宗奭自放于酒，宗奭曰：

“举世无知我者，惟酒知我。吾与世人言，口液干，不领吾意。与酒未交口，心已相醉。故吾得酒，寝加安，食加旨，神充而气完。酒诚我益友，何谓放耶？”疑者愧之。宗奭今老矣，吾闻于上虞魏彝仲云。

为说者曰：吾始读陶靖节诗，怪其喜饮酒，而又时时称严子陵之为人，以为子陵清苦高劲，如乔松秀竹，岂饮酒者比哉！及求靖节之志，固不为酒，特托酒以自适耳，无害其为同也。今宗奭以子陵之裔，而又慕乎靖节，其事与靖节不甚相类也，岂亦靖节慕子陵之意耶？非耶？且宗奭谓酒为知己，其亦有所见而云耶？抑有所激耶？列之以示好事者辨焉。（四部丛刊景明正德本《宋学士全集》卷第七十四）

元史（选录）

卷一 本纪第一（节录） 岁癸丑，汪罕父子谋欲害帝，乃遣使者来曰：“向者所议姻事，今当相从，请来饮布浑察儿。”布浑察儿，华言许亲酒也。

卷二 本纪第二（节录） 二年庚寅春正月，诏自今以前事勿问。定诸路课税，酒课验实息十取一，杂税三十取一。

（十三年）十一月丁亥，大猎。庚寅，还至鉞铁鐔胡兰山。奥都刺合蛮进酒，帝欢饮，极夜乃罢。

卷三 本纪第三（节录） （八年冬十月）癸未，如利州，观其城池并非深固，以汪田哥能守，蜀不敢犯，赐卮酒奖谕之。

卷四 本纪第四（节录） （中统二年六月）乙卯，敕平阳路安邑县葡萄酒自今毋贡。

卷五 本纪第五（节录） （中统三年三月）甲申，免高丽酒课。

（至元元年夏四）辛酉，以四川茶、盐、商、酒、竹课充军粮。

卷六 本纪第六（节录） （至元三年十一月）丙辰，千户散竹带以嗜酒失所守大良平，罪当死，录其前功免死，令往东川军前自效。

（至元四年八月）辛酉，申严平滦路私盐酒醋之禁。

（至元四年九月）癸丑，申严西夏中兴等路僧尼、道士商税、酒醋之禁。

卷七 本纪第七（节录） （至元七年二月）丙子，帝御行宫，观刘秉忠、孛罗、许衡及太常卿徐世隆所起朝仪，大悦，举酒赐之。

（至元七年九月丙寅）山东饥，敕益都、济南酒税以十之二收粮。

卷九 本纪第九（节录） （至元十三年九月）己亥，享于太庙，常饌外，益野豕、鹿、羊、葡萄酒。

（至元十四年）五月癸巳，申严大都酒禁，犯者籍其家货，散之贫民。

卷十 本纪第十（节录） （至元十五年春正月）壬寅，弛女直、水达达酒禁。

（至元十五年二月）辛未，以川蜀地多岚瘴，弛酒禁。

（至元十五年夏四月甲子）以时雨沾足，稍弛酒禁，民之衰疾饮药者，官为酝酿量给之。

（至元十五年）冬十月己未，享于太庙，常设牢醴外，益以羊、鹿、豕、葡萄酒。

（至元十五年十一月）甲午，开酒禁。

卷十一 本纪第十一（节录） （至元十八年五月）己酉，禁甘肃瓜、沙等州为酒。

卷十二 本纪第十二（节录） （至元十九年冬十月庚戌）禁大都及山北州郡酒。

（至元二十年夏四）申严酒禁，有私造者，财产、女子没官，犯人配役。

（至元二十年九月）辛未，以岁登，开诸路酒禁。

卷十三 本纪第十三（节录）（至元二十一年十二月）癸亥，卢世荣言：“京师富豪户酿酒，价高而味薄，以致课不时输，宜一切禁罢，官自酤卖。向之岁课，一月可办。”从之。

（至元二十二年春正月丙申）诏禁私酒。

（至元二十二年二月）壬戌，申禁私造酒曲。

（至元二十二年八月丙寅）罢榷酤。初，民间酒听自造，米一石官取钞一贯。卢世荣以官钞五万锭立榷酤法，米一石取钞十贯，增旧十倍。至是，罢榷酤，听民自造，增课钞一贯为五贯。

卷十四 本纪第十四（节录）（至元二十三年八月辛酉）甘州饥，禁酒。

（至元二十四九月年）以西京、平滦路饥，禁酒。

卷十五 本纪第十五（节录）（至元二十五年二月丙寅）改江西茶运司为都转运使司，并榷酒醋税。（己卯）禁辽阳酒。

（至元二十五年夏四月）庚申，以武冈、宝庆二路荐经寇乱，免今年酒税课及前岁逋租。

（至元二十五年五月）丁酉，平江水，免所负酒课。

（至元二十五年六月）辛酉，禁上都、桓州、应昌、隆兴酒。

（至元二十五年秋七月丙戌）弛宁夏酒禁。

（至元二十六年冬十月）丙辰，禁内外百官受人馈酒食者，没其家货之半。

卷十六 本纪第十六（节录）（至元二十七年秋七月）丙午，禁平地、忙安仓酿酒，犯者死。

（至元二十七年八月）庚辰，免大都、平滦、河间、保定四路流民租赋及酒醋课。

（至元二十七年冬十月辛巳）禁大同路酿酒。

（至元二十七年十一月）甲寅，禁上都酿酒。己未，禁山后酿酒。

（至元二十八年三月）己亥朔太原饥，严酒禁。

（至元二十八年五月辛亥）宫城中建葡萄酒室及女工室。

（至元二十八年九月）壬子，酒醋课不兼隶茶盐运司，仍隶各府县。

（至元二十八年冬十月丁亥）严山后酒禁。

卷十七 本纪第十七（节录）（至元二十九年夏四月）弛甘肃酒禁，榷其酤。辛巳，弛太原酒禁，仍榷酤。

（至元二十九年五月丁未）以陕西盐运司酒税等课已入州县，罢诸子盐司。

（至元二十九年八月戊午）弛平滦州酒禁。

（至元二十九年冬十月）癸巳，弛上都酒禁。

卷十八 本纪第十八（节录）（至元三十一年六月壬辰）以甘肃等处米价踊贵，诏禁酿酒。

（元贞元年闰四月己未）弛甘州酒禁。

卷十九 本纪第十九（节录）（元贞二年三月壬申）罢太原、平阳路酿进葡萄酒，其葡萄酒园民恃为业者，皆还之。

（元贞二年秋七月）丁亥，免上都酒课三年。

（大德二年五月辛卯）罢荨麻林酒税羨余。

卷二十 本纪第二十（节录）（大德三年十一月庚辰）禁和林酿酒。

（大德五年三月）癸巳，禁和林酿酒，其诸王、驸马许自酿饮，不得沽卖。

（大德五年九月）丙辰，江陵、常德、沔州皆旱，并免其门摊、酒醋课。

（大德五年冬十月）丙戌，以岁饥禁酿酒，弛山泽之禁，听民捕猎。

（大德五年十一月己亥）近因禁酒，闻年老需酒之人有预市而储之者，其无酿具者勿问。

（大德六年春正月丙午）陕西旱，禁民酿酒。



(大德六年十一月)庚戌,禁和林军酿酒,惟安西王阿难答、诸王忽刺出、脱脱、不沙、也只里、驸马蛮子台、弘吉列带、燕里干许酿。

(大德六年十一月庚申朔)复请禁诸路酿酒,减免差税,赈济饥民。

卷二十一 本纪第二十一 (节录) (大德七年春正月)己酉,以岁不登,禁河北、甘肃、陕西等郡酿酒。

(大德七年二月庚辰)并大都盐运司入河间运司,其所掌京师酒税课,令户部领之。

(大德七年五月己丑)开上都、大都酒禁,其所隶两都州县及山后、河东、山西、河南尝告饥者,仍悉禁之。

(大德七年闰五月癸未)诏上都路、应昌府、亦乞列思、和林等处依内郡禁酒。

(大德七年六月乙巳)浙西淫雨,民饥者十四万,赈粮一月,仍免今年夏税并各户酒醋课。

(大德七年冬十月)戊子,弛太原、平阳酒禁。

(大德七年十二月)乙酉,弛京师酒课,许贫民酿酒。

(大德八年)六月癸未,开和林酒禁,立酒课提举司。

(大德九年春正月)壬申,弛大都酒禁。

(大德九年)秋七月乙巳朔,禁晋宁、冀宁、大同酿酒。

(大德十年春正月丁卯)弛大同路酒禁。

卷二十二 本纪第二十二 (节录) (大德十一年九月丙子)江浙饥,中书省臣言:“……杭州一郡,岁以酒糜米麦二十八万石,禁之便。河南、益都诸郡,亦宜禁之。”制可。

(大德十一年十一月乙亥)建康路属州县饥,诏免今年酒醋课。

(大德十一年十二月庚戌)山东、河南、江浙饥,禁民酿酒。

(至大元年秋七月癸酉)弛上都酒禁。

(至大元年九月乙亥)弛诸路酒禁。

(至大元年闰十一月丁未)以杭州、绍兴、建康等路岁比饥谨,今年酒课免十分之三。

卷二十三 本纪第二十三 (节录) (至大二年二月)甲戌,弛中都酒禁。

(至大二年冬十月)辛酉,弛酒禁,立酒课提举司。戊寅,御史台臣言:“岁凶乏食,不宜遽弛酒禁。”有旨:“其与省臣议之。”

(至大三年春正月癸未)赐宣徽院使拙忽难所隶酒人钞万五百八十八锭。

卷二十四 本纪第二十四 (节录) (至大四年五月)丁丑,禁毋以毒药酿酒。

(至大四年六月)丁卯,罢只合赤八刺合孙所造上供酒。

(皇庆二年二月)庚辰,冀宁路饥,禁酿酒。

(皇庆二年三月庚子)以晋宁、大同、大宁、四川、巩昌、甘肃饥,禁酒。

(皇庆二年夏四月乙酉)真定、保定、河间、大宁路饥,并免今年田租十之三,仍禁酿酒。

(皇庆二年五月辛丑)顺德、冀宁路饥,辰州水,赈以米、钞,仍禁酿酒。

卷二十五 本纪第二十五 (节录) (延祐元年春正月)丙申,除四川酒禁。兴元、凤翔、涪州、邠州岁荒,禁酒。

(延祐元年)十二月壬午,汴梁、南阳、归德、汝宁、淮安水,敕禁酿酒,量加赈恤。

卷二十六 本纪第二十六 (节录) (延祐四年夏四)乙丑,禁岭北酒。

(延祐五年三月)癸未,知宁、净州路禁酒。

(延祐五年冬十月)辛卯,禁大同、冀宁、晋宁等路酿酒。

(延祐五年)十一月辛酉,开成、庄浪等处禁酒。

(延祐六年三月壬午)禁甘肃行省所属郡县酿酒。

(延祐六年九月癸卯) 山东诸路禁酒。

卷二十七 本纪第二十七 (节录) (延祐七年夏四月己未) 申严和林酒禁。

(延祐七年五月辛卯) 弛陕西酒禁。

(延祐七年九月甲申) 罢上都、岭北、甘肃、河南诸郡酒禁。

(至治元年春正月癸巳) 奉元路饥，禁酒。

(至治元年十一月) 癸巳，以营田提举司征酒税扰民，命有司兼榷之。

(至治元年十二月己未) 真定、保定、大名、顺德等路水，民饥，禁酿酒。

卷二十八 本纪第二十八 (节录) (至治二年二月壬子) 河间路饥，禁酿酒。

(至治二年三月) 癸酉，河南两淮诸郡饥，禁酿酒。

(至治二年夏四月) 丙辰，恩州饥，禁酿酒。

(至治二年五月己巳) 彰德府饥，禁酿酒。

(至治二年十二月癸未) 弛河南、陕西等处酒禁。

(至治三年二月辛卯) 诸王怯伯遣使贡葡萄酒。

(至治三年五月) 乙巳，岭北米贵，禁酿酒。

卷二十九 本纪第二十九 (节录) (泰定元年二月甲戌) 高昌王亦都护帖木儿补化遣使进葡萄酒。

(泰定元年六月庚申) 延安路饥，禁酒。

(泰定元年八月) 庚申，市牝马万匹取湏酒。辛未，以金泉馆酒课赐公主寿宁。

(泰定二年闰月) 己卯，河间、真定、保定、瑞州四路饥，禁酿酒。

(泰定二年夏四月辛丑) 禁山东诸路酒。

(泰定二年九月戊申朔) 禁大都、顺德、卫辉等十郡酿酒。

(泰定二年冬十月) 壬午，禁成都路酿酒。

(泰定二年十二月) 丁酉，弛瑞州路酒禁。壬寅，大宁路凤翔府饥，禁酿酒。

卷三十 本纪第三十 (节录) (泰定三年二月) 己丑，禁汴梁路酿酒。

(泰定三年五月乙巳) 泾州饥，禁酿酒。

(泰定三年八月) 辛卯，云南行省丞相亦儿吉鹞、廉访副使散只兀台，以使酒相诋，状闻，诏两释之。

(泰定三年九月) 丁巳，弛大都、上都、兴和酒禁。

(泰定三年冬十月庚子) 弛宁夏路酒禁。

(泰定三年十一月辛酉) 弛成都酒禁。

(泰定四年冬十月) 戊戌，诸王脱别帖木儿、哈儿蛮等献玉及葡萄酒，赐钞六千锭。

(泰定四年) 十一月庚午，禁晋宁路酿酒。

(致和元年) 二月癸卯，弛汴梁路酒禁。

卷三十二 本纪第三十二 (节录) (致和元年十一月丁卯) 汴梁、河南等路及南阳府频岁蝗旱，禁其境内酿酒。

(致和元年十二月) 己酉，开上都酒禁。戊午，诏：“被兵郡县免杂役。禁酿酒，弛山场河泺之禁……”

卷三十三 本纪第三十三 (节录) (天历二年三月甲戌) 开辽阳酒禁。

(天历二年冬十月丙戌) 禁奉元、永平酿酒。

(天历二年十二月丁未) 中书省臣言：“在京酒坊五十四所，岁输课十余万锭。比者间以赐诸王、公主及诸官寺。诸王、公主自有封邑、岁赐，官寺亦各有常产，其酒课悉令仍旧输官为宜。”

从之。开河东冀宁路、四川重庆路酒禁。

卷三十四 本纪第三十四（节录） （至顺元年三月）丁卯，木八刺沙来贡葡萄酒，赐钞币有差。乙亥，西番哈刺火州来贡葡萄酒。辛巳，诸王哈儿蛮遣使来贡葡萄酒。

卷三十五 本纪第三十五（节录） （至顺二年春正月庚寅）诸王哈儿蛮遣使来贡葡萄酒。（至顺二年秋七月丁亥）诸王搠思吉亦儿甘卜、哈儿蛮，驸马完者帖木儿遣使来献葡萄酒。（至顺二年十二月）戊午，西域诸王秃列帖木儿遣使献西马及葡萄酒。

卷三十六 本纪第三十六（节录） （至顺三年二月）甲辰，诸王答儿马失里、哈儿蛮各遣使来贡葡萄酒、西马、金鸦鹞。

卷三十八 本纪第三十八（节录） （元统二年夏四月乙酉）是月，车驾时巡上都。益都、东平路水，设酒禁。

卷三十九 本纪第三十九（节录） （元统三年五月）乙巳，以兴州、松州民饥，禁上都、兴和造酒。

卷四十 本纪第四十（节录） （后至元元年九月壬寅）赐酒宣文阁中，仍赐貂裘、金织纹币。

卷四十一 本纪第四十一（节录） （后至元四年十一月）戊申，河南民饥，禁酒。（后至元五年九月）戊戌，开酒禁。（后至元六年）五月壬午，陕西饥，禁酒。（至正八年五月）丁巳，四川旱，饥，禁酒。

卷四十三 本纪第四十三（节录） （至正十四年九月戊子）禁河南、淮南酒。

卷四十四 本纪第四十四（节录） （至正十五年闰月）是月，上都路饥，诏严酒禁。（至正十六年）三月辛巳朔，复立酒课提举司。

卷四十七 本纪第四十七（节录） （至正二十七年夏五月丙子朔）以去岁水潦霜灾，严酒禁。

卷六十七 志第十八（节录） 摄行告庙仪（如受尊号，上太皇太后、皇太后册宝，册立皇后、皇太子，凡国家大典礼，皆告宗庙）：

前期二日，太庙令扫除内外，翰林国史院学士撰写祝文；前一日，告官等致斋一日。其日，告官等各服紫服，奉祝版，进请御署讫，差控鹤，用红罗销金案抬昇，覆以黄罗帕，并奉御香、御酒，如常仪，迎至祝所斋宿。告日质明前三刻，礼直官引太庙令，率其属入庙殿，开室，陈设如仪。礼直官引告官等，各服紫服，以次入就位，东向立定。礼直官稍前，赞曰“有司谨具，请行事”。赞者曰“再拜”，在位者皆再拜。礼直官先引执事者各就位，次引告官诣盥洗、爵洗位，北向立。搯笏，盥手，帨手，洗爵、拭爵讫，执笏，请诣酒尊所，搯笏，执爵，司尊者举幂，良酝令酌酒，以爵授奉爵官，执笏，诣太祖室，再拜。执事者奉香，告官搯笏跪，三上香，执爵三祭酒，以虚爵授奉爵官，执笏，俯伏兴。举祝官搯笏跪，对举祝版，读祝官跪读祝文讫，奠祝于案，执笏，俯伏兴。礼直官、赞告官再拜毕，每室并如上仪。告毕，引告官以下降，复位。再拜讫，诣望瘞燔祝，再拜，半燎，告官以下皆退。

卷七十二 志第二十三（节录） （祭祀）器物之等，其目有八：

……

二曰尊罍。上帝太尊、著尊、牺尊、山罍各二，在坛上东南隅，皆北向，西上；设而不酌者，象尊、壶尊各二，山罍四，在坛下西陛之东，皆北向，西上。皇地祇亦如之，在上帝酒尊之东，皆北向，西上。配帝著尊、牺尊、象尊各二，在地祇酒尊之东，皆北向，西上。设而不酌者，牺尊、壶尊各二，山罍四，在坛下西陛之北，东向，北上。五帝、日月、北极、天皇，皆太尊一，著尊

二。内官十二次，各象尊二。中官十二次，各壶尊二。外官十二次，各概尊二。众星十二次，各散尊二。凡尊各设于神座之左而右向，皆有站，有勺，加幂，幂之绘以云，惟设而不酌者无勺。

……

四曰酒齐。以太尊实泛齐，著尊实醴齐，牺尊实盎齐，山罍实三酒，皆有上尊。马湏设于尊罍之前，注于器而幂之。设而不酌者，以象尊实醴齐，壶尊实沈齐，山罍二实三酒，皆有上尊，以祀昊天上帝。皇地祇亦如之。以著尊实泛齐，牺尊实醴齐，象尊实盎齐，山罍实清酒，皆有上尊。马湏如前设之。设而不酌者，以牺尊实醴齐，壶尊实沈齐，山罍三实清酒，皆有上尊，以祀配帝。以太尊实泛齐，以著尊实醴齐，皆有上尊，九位同，以祀五帝、日月、北极、天皇大帝。以象尊实醴齐，有上尊，十二次同，以祀内官。以壶尊实沈齐，有上尊，十二次同，以祀中官。以概尊实清酒，有上尊，十二次同，以祀外官。以散尊实昔酒，有上尊，十二次同，以祀众星。凡五齐之上尊，必皆实明水；山罍之上尊，必皆实玄酒；散尊之上尊，亦实明水。

……

卷七十三 志第二十四（节录） 祭告三献仪，大德十一年所定……礼直官引初献诣盥洗位，盥手讫，诣爵洗位，洗拭爵讫，诣酒尊所，酌酒讫，请诣昊天上帝神位前，北向，搢笏跪，三上香，执爵三祭酒于茅苴，出笏，俯伏兴，俟读祝讫，再拜，平立。请诣皇地祇酒尊所，酌献并如上仪，俱毕，复位……

祭告一献仪，至元十二年所定……礼直官先引执事官各就位，次诣告官前曰“请诣盥爵洗位”。至位，北向立，曰“搢笏”，曰“盥手”，曰“帨手”，曰“洗爵”，曰“拭爵”，曰“出笏”，曰“诣酒尊所”，曰“搢笏”，曰“执爵”，曰“司尊者举幂”，曰“酌酒”。良酝令酌酒，曰“以爵授执事者”，告官以爵授执事者。曰“出笏”，曰“诣昊天上帝、皇地祇神位前，北向立”，曰“稍前”，曰“搢笏”，曰“跪”，曰“上香”，曰“上香”，曰“三上香”，曰“祭酒”，曰“祭酒”，曰“三祭酒”，曰“以爵授捧爵官”，曰“出笏”，曰“俯伏兴”，曰“举祝官跪”，曰“举祝”，曰“读祝官跪”，曰“读祝”……

卷七十四 志第二十五（节录） 亲祀时享仪，其目有八：

……

七曰酌献。礼直官于殿上赞太祝立茅苴，礼仪使奏请诣盥洗位。帘卷，出次，宫县乐作。殿中监跪进镇圭，皇帝执镇圭至盥洗位，乐止，北向立。礼仪使奏请搢镇圭，执事者跪取匱，兴、沃水，又跪取盘，承水。礼仪使奏请皇帝盥手，执事者跪取巾于筐，兴，进。帨手讫，礼仪使奏请执镇圭，请诣爵洗位，北向立。礼仪使奏请搢镇圭，奉爵官以爵跪进。皇帝受爵，执事者奉匱沃水，奉盘承水。皇帝洗爵讫，执事者奉巾跪进。皇帝拭爵，执事者奠盘匱，又奠巾于筐，奉爵官受爵。礼仪使奏请执镇圭，升殿。宫县乐作，至西阶下，乐止。升自西阶，登歌乐作，礼仪使前导诣太祖室尊彝所，东向立，乐止。礼仪使奏请搢镇圭执爵，奉爵官以爵跪进。皇帝受爵，司尊者举幂，良酝令跪酌牺尊之泛齐，以爵授执事者。礼仪使奏请执镇圭，皇帝执圭，入诣太祖神位前，北向立。宫县乐作，奏开成之曲。礼仪使跪奏请搢镇圭跪，又奏请三上香。三上香讫，奉爵官以爵授进酒官，进酒官东向以爵跪进。礼仪使奏请执爵，三祭酒于茅苴，以虚爵授进酒官，进酒官以授奉爵官，奉爵官退立尊彝所。进酒官进取神案上所奠玉爵马湏，东向跪进，礼仪使奏请执爵祭马湏。祭讫，以虚爵授进酒官，进酒官进奠神案上，退。礼仪使奏请执圭，俯伏兴，司徒搢笏跪于俎前，奉牲西向以进。礼仪使奏请搢镇圭，皇帝搢圭，俯受牲盘，北向跪奠神案上。蒙古祝史致辞讫，礼仪使奏请执镇圭兴，前导，出户外褥位，北向立，乐止。举祝官搢笏跪，对举祝版，读祝官北向跪，读祝文讫，俯伏兴，举祝官奠祝版讫，先诣次室。礼仪使奏请再拜。拜讫，礼仪使前导诣各室，备奏本室之乐。其酌献、进牲、祭马湏，并如第一室之仪。既毕，礼仪使奏请诣饮福位。登歌乐作；

至位，西向立，乐止。登歌厘成之乐作，礼直官引司徒立于饮福位侧，太祝以爵酌上尊饮福酒，合置一爵，以奉侍中，侍中受爵，奉以立。礼仪使奏请皇帝再拜。拜讫，奏请搢镇圭跪。侍中东向以爵跪进，礼仪使奏请执爵，三祭酒，又奏请啐酒。啐酒讫，以爵授侍中。礼仪使奏请受胙，太祝以黍稷饭笱授司徒，司徒东向跪进。皇帝受，以授左右。太祝又以胙肉俎跪授司徒，司徒跪进。皇帝受，以授左右。礼直官引司徒退立。侍中再以爵酒跪进，礼仪使奏请皇帝受爵饮福。饮福讫，侍中受虚爵，兴，以授太祝。礼仪使奏请执镇圭，俯伏兴，又奏请再拜。拜讫，乐止。礼仪使前导还版位，登歌乐作，降自西阶，乐止。宫县乐作，至位乐止。礼仪使奏请还小次。宫县乐作。将至小次，礼仪使奏请释镇圭，殿中监跪受。入小次，帘降，乐止。文舞退，武舞进。先是皇帝酌献讫，将至小次，礼直官引亚献官诣盥洗位。盥洗讫，升自阼阶，酌献并如常仪。酌献讫，礼直官引亚献官诣东序，西向立。诸太祝各以壘酌福酒，合置一爵，一太祝捧爵进亚献之左，北向立。亚献再拜受爵，跪祭酒，遂啐饮。太祝进受爵，退，复于坫上。亚献兴再拜，礼直官引亚献官降复位。终献如亚献之仪。初终献既升，礼直官引七祀献官各诣盥洗位，搢笏盥帨讫，执笏诣神位，搢笏跪执爵，三祭酒，奠爵执笏，俯伏兴，再拜讫，诣次位，如上仪。

……

卷七十五 志第二十六（节录） 亲谢仪，其目有八：

……

七曰酌献。太尉既升裸，礼直官引博士，博士引礼仪使至大次前，北向立。通事舍人引侍中诣大次前，版奏请中严，皇帝服袞冕。坐少顷，侍中奏外办，礼仪使跪奏请皇帝行礼，俯伏兴。帘卷出次，礼仪使前导至西神门，华盖伞扇停于门外，近侍从入，太礼使后从。殿中监跪进镇圭，皇帝执圭入门，协律郎跪，俯伏兴，举麾，宫县顺成之乐作，至版位东向立，乐止。引礼官分左右侍立，礼仪使奏请皇帝再拜。奉礼曰“众官再拜”，赞者承传，凡在位者皆再拜。礼仪使奏请皇帝诣盥洗位，宫县乐作，至位乐止。内侍跪取匱，兴，沃水，又内侍跪取盘，承水。礼仪使奏请搢镇圭，皇帝搢圭盥手。内侍跪取巾于筐，兴，进。帨手讫，奉爵官以爵跪进。皇帝受爵，内侍奉匱沃水，又内侍奉盘承水。皇帝洗爵讫，内侍奉巾跪进。皇帝拭爵讫，内侍奠盘匱，又奠巾于筐，奉爵官受爵。礼仪使奏请执镇圭，导升殿，宫县乐作，至西阶下乐止。升自西阶，登歌乐作。礼仪使前导诣太祖室尊彝所，东向立，乐止。宫县乐作，奏开成之曲。奉爵官以爵莅尊，执事者举幂，侍中跪酌牺尊之泛齐，以爵授执事者。礼仪使前导，入诣太祖神位前，北向立。礼仪使奏请搢镇圭，跪，又奏请三上香。上香讫，奉爵官以爵授进酒官，进酒官东向以爵跪进，礼仪使奏请执爵祭酒。执爵三祭酒于茅苴讫，以虚爵授进酒官，进酒官受爵以授奉爵官，退立尊彝所。进酒官进彻神案上所奠玉爵马湏，东向跪进，礼仪使奏请执爵祭马湏。祭讫以虚爵授进酒官，进酒官进奠神案上讫，退。礼仪使奏请执圭，俯伏兴，司徒搢笏跪俎前，举牲盘西向以进。礼仪使奏请搢镇圭，皇帝搢圭，俯受牲盘，北向跪，奠神案上讫，礼仪使奏请执圭兴，前导出户外褥位，北向立，乐止。举祝官搢笏跪，对举祝版。读祝官北向跪，读祝文讫，俯伏兴。举祝官奠祝版讫，先诣次室。次蒙古祝史诣室前致祠讫，礼仪使奏请再拜。拜讫，礼仪使前导诣各室，奏各室之乐。其酌献、进牲体、祭马湏，并如第一室之仪。既毕，礼仪使奏请诣饮福位。登歌乐作，至位，西向立，乐止。宫县厘成之乐作，礼直官引司徒立于饮福位侧，太祝以爵酌上尊福酒，合置一爵，以奉侍中，侍中受爵奉以立。礼仪使奏请皇帝再拜。拜讫，奏搢镇圭跪，侍中东向以爵跪进。礼仪使奏请执爵三祭酒，又奏请啐酒。啐讫，以爵授侍中。礼仪使奏请受胙，太祝以黍稷饭笱授司徒，司徒东向跪进，皇帝受，以授左右。太祝又以胙肉俎跪授司徒，司徒跪进，皇帝受，以授左右，礼直官引司徒退立。侍中再以爵酒跪进，礼仪使奏请皇帝受爵，饮福酒讫，侍中受虚爵兴，以授太祝……

……